

5. september 2008

UKA 2008/62

Inatsisissatut missingiummut nassuiaatit

Nassuiaatit nalinginnaasut

1. Aallarniut:

Saqqummiunneqartoq una Kalaallit Nunaata nunap immikkoortuinut kommuneqarfinnullu aggorneqarnera pillugu inatsisartut inatsisaannut nr. 11, 30. oktober 1998-imeersumut (kingusinnerusukkut inatsisartut inatsisaatigut nr. 6/2000 aamma inatsisartut inatsisaatigut nr. 11/2003 allannguuteqartinneqartup) allannguutissaatut siunnersuutaavoq.

Inatsisissatut siunnersuummut matumunnga tunuliaqutaasoq tassaavoq pisortat ingerlatsiviini tamani iluarsaaqqinnissamik kissaateqarneq, soorlu Namminersorneq pillugu Isumalioqatigiissitat isumaliutissiissutaanni (2003) siunnersuutigineqartoq namminersornermullu ingerlanerup ilaatut. Namminersorneq pillugu Isumalioqatigiissitap isumaliutissiissutaanut nangissutitut 2003-mi Naalakkersuisut pilersippaat Aaqqissuussaannermut Isumalioqatigiissitap, taassuma suliassaralugit pisortat ingerlatsiviini tamani suliassanik naammassinnittarnermi allannguutissat aalajangiiffiginissaannut tunngavissanik teknikikkut suliatigullu nassuiaasersuinerup pigineqalernissaa. Kalaallit Nunaata nunap immikkoortuinut aggorneqarnera pillugu Inatsisartut inatsisaanni § 1-imi aalajangersakkat inatsisissatut siunnersuummut ingerlateqqinneqarput, malittarisani oqaatigineqartut suli atuuttut pissutigalugit.

2. Inatsisissatut siunnersuummut tunuliaqutaasut:

2006-imi Aaqqissuussaannermut Isumalioqatigiissitap isumaliutissiissumminik saqqummiussaqqarpoq, tassani pisortat ingerlatsiviini tamani allannguinermi sinaakkutissat, matumanittaaq suliassanik Namminersornerullutik Oqartussaniit kommunerujussuarnut nutaanut sisamanut tunniussinissamut, naalakkersuinikkut aalajangiinissamut tunngavissat nassuiarneqarput. Nunap suatungaaniinnermut innuttaqassutsimullu tunngasut suut, matumanittaaq kommunit qanoq angitiginissaat, siunissami kommuninik aaqqissuussinissamut tunngaviutinneqarnissaannut siunnersuutinik Aaqqissuussaannermut Isumalioqatigiissitap saqqummiussaqqarpoq.

Tassunga nangissutitut pisortat ingerlatsiviini aaqqissuussaannerup iluarsaateqqinneqarnissaa pillugu Isumaliutissiissut Naalakkersuisut siulittaasuannit Inatsisartunut (UPA2006/15) saqqummiunneqarpoq, tassani aalajangiunneqarpoq pisortat ingerlatsiviini iluarsaaqqinnermik suliaq Naalakkersuisut ingerlateqqissagaat.

UKA2006-imi Naalakkersuisut peqquneqarput kommunit 18-iusut
kommunerujussuarnut sisamanut kattussuutsinneqarnissaat siunertaralugu
UKA2007-imi aalajangiiffigisassatut siunnersuummik saqqummiusseqqullugit.

Aaliangiiffigisassatut siunnersuutip kommuninut tusarniaatigineqareerneratigut
UKA2007-imi Inatsisartut aalajangerput, kommunerujussuassat sisamat
kattussuutsinneqassasut kiisalu qanoq killeqarfilersorneqarnissaat kommunit
nammineerlutik kissaatigisaat naapertorlugu aalajangersarneqassasoq. Kujataata
Kommunianut tunngatillugu killeqarfilersuinissaq pillugu Inatsisartuni
sammineqarpoq malitsigisaanillu Ataatsimiititaliap nalunaarutaani (UPA 2007/26)
kissaatigineqarpoq Kujataata Kommuniata avannamut killeqarfia
isorartuninngorlugu allineqassasoq (Takuuk nunap assinga ilanngussaq). Tamanna
tunngavigalugu kommunit aggorneqarnerat pillugu inatsit matumuuna
allanngortinneqarpoq.

3. Inatsisissatut siunnersuutip imarisai pingaarnert:

Inatsisissatut siunnersuutip imarai Kalaallit Nunaata nunap immikkoortuinut
kommuneqarfinnullu aggorneqarnera pillugu inatsisartut inatsisaata nr. 11, 30.
oktober 1998-imeersup (kingusinnerusukkut inatsisartut inatsisaatigut nr. 6/2000
aamma inatsisartut inatsisaatigut nr. 11/2003 allannguuteqartinneqartup)
allannguutissaatut siunnersuut.

Inatsisissatut maannakkut siunnersuutaasup pingaarnertut imarisaanut ilaapput
kommuneqarfinnut aggorneqarnerata kommunit 18-iniit kommunerujussuarnut
sisamanut aggorneqarnissaa pillugu inatsisissatut siunnersuut tamatumalu
kingunerisaanik nutaanik killeqarfiliineq. Tamatuma peqatigisaanik kommunit
siusinnerusukkut killeqarfii nunamik kommuninut 18-inut mikinnerusunut
agguataarisooq atorunnaassapput.

Kommuneqarfinnut aggorneqarnera pillugu inatsit siunissami (1. januar 2009-miit) §
2-mi kommuniulersussat pillugit Inatsisartut aalajangiinerannik inatsisikkut
tunngaveqalerpoq, kommunit taakku tassaassapput:

Avannaq: Qaanaaq, Upernavik, Uummannaq, Ilulissat, Qeqertarsuaq,
Qasigiannquit, Aasiaat aamma Kangaatsiaq. Ateqalerpoq Qaasuitsup kommunia.

Qeqqa: Sisimiut aamma Maniitsoq. Ateqalerpoq Qeqqata kommunia.

Kangia/Kitaa: Nuuk, Paamiut, Ivittuut, Ittoqqortoormiit aamma Ammassalik.
Ateqalerpoq Sermersuup kommunia.

Kujataa: Qaqortoq, Narsaq aamma Nanortalik. Ateqalerpoq Kommune Kujalleq.

Ikaarsaariarnermi ataatsimiititaliat immikkut inatsisip § 16-iat malillugu kommunip
atissai 4-it nutaat ilisarnaattissaallu innersuussutigaat. Kommunit atissaat
ilisarnaattissaallu nutaat uani inatsimmi ilanngussatut takuneqarsinnaapput.

Naalakkersuisut Inatsisartullu ikaarsaariarnermi ataatsimiititaliat kissaataat inatsisip akuersissutiginerani malissimavaat.

3.1. Kujataata kommunia. Kommune Kujalleq.

Aaqqissuusseqqinnermi maannamut sulinermi Naalakkersuisut nalunaarutaanni:
"Aaqqissuussaanermik iluarsaaqqinnermi sulinerup killiffia – Upernaaq 2007"
takuuk nunap assinga qupperneq 3-mi taaneqartut Kujataata kommuniata aamma Kangiata/Kitaata kommuniani killeqarfik allangortinnagu aallaavigineqarsimavoq

Inatsisissatut missingiutip matuma suliarineqarneranut atatillugu Inatsisartut oqallinneranni (UPA 2007/26) aaqqissuusseqqinnissaq pillugu siunnersuutigineqarpoq, Kujataata kommuniani kommunip killeqarfia avannamut isorartunerussasoq, taamaalilluni Kujataata kommunia nunatamigut allineqassaaq.

Tassunga uiggiullugu Aaqqissuusseqqinneq pillugu Inatsisartut Ataatsimiititaliaat siunnersuutip aappassaaneerineqarneranut Nalunaarummik tunniussaqqarpoq, tassani takuneqarsinnaavoq: *"naleqquttuusaaq kommunit killiligaanerat sukumiinerusumik isigissallugu matumanilu ilanngullugu eqqarsaatigissallugu Kujataata kommuniata nunataata annikinnera innuttaasullu amerlassusiat tassunga atatillugu allineqarsinnaannginnersoq."* aamma... *"Naalakkersuisut nalunaarutiginiuuat, kommuninik erseqqarinnerusumik killiliinissaq pillugu kissaatigisaat Kalaallit Nunaata nunap immikkoortuinut kommuneqarfinnullu aggorneqarnera pillugu Inatsisartut inatsisaata allangortinneqarnissaanut atatillugu suliarineqartariaqartoq. Aaqqissuusseqqinnermut Ataatsimiititaliap naatsorsuutigaa tamanna pissasoq....."*

Aammattaq suliami Naalakkersuisut ilisimatitsissutaanni takuneqarsinnaavoq:
"Kujataani kommunit pingasut (Nanortalik, Qaqortoq aamma Narsaq) kissaatigigaat Kalaallit Nunaata Tunuani kommunip killeqarfiata allangortinneqarnissaa pillugu Ammassallip kommunianik Naalakkersuisunillu isumaqatiginninniarnert aallartisarneqarnissaat, taamaalilluni killeqarfiup Timmiarmiut angumalissallugit".

Tamanna tunngavigalugu Naalakkersuisut inassutigaat, siunnersuummi matumani Kujataata kommuniata killeqarfilernerata allineqarnissaa Narsap eqqaani isuani avannamut kangillerpaamiit Timmiarmiunut, takuuk malittarisassap oqaasertaa § 2-mi, imm. 1. Inatsisartut Ataatsimiititaliaata kissaatigisaanut naapertuuttumik.

Tusarniaanermut atatillugu ikaarsaariarnermi ataatsimiititaliap killeqarfiliinissaq pillugu apeqqummut isummernissaa Naalakkersuisut utaqqinikuuaat kiisalu Kujataata kommuniata killeqarfilernerata allangortinneqarneranut apeqqut pillugu kommunit allat qanoq isumaqarnerlutik nalunaarutigineqarnissaat utaqqinikuullugu takuuk imm. 10 tusarniaanermi.

3.2. Kommunit aggorneqarnerat pillugu inatsisissatut siunnersuummi ilanngunneqanngitsut

Nuna Allannngutsaaliugaq Pituffillu (Thule Air base) kommunit aggorneqarnerat pillugu inatsimmi ilanngunneqanngillat. Isumannaatsuunissamut atatillugu Pituffik ilanngunneqanngilaq isumaqatigiissut 27. april 1951-meersoq naapertorlugu Kalaallit Nunaata illersorneqarnera pillugu.

Nuna Eqqissisimatitaaq naatsorsuutigineqarpoq nunap tamarmiusup oqaasissaqarfigigaa taamaattumillu kommunerujussuit pilersinneqarneranni inatsisissap matuma killeqarfiliinerinut ilaatinneqanngilaq. Taamaamat kommunit namminernit Nuna Eqqissisimatitaaq aqunneqanngilaq, kisiannili Attaveqarnermut Avatangiisinullu Naalakkersuisoqarfimmit, tassungalu innuttaasut qinnuteqaatit, apeqquteqaatit, ilisimatuutut misissuinerit il.il pillugit saaffiginnissapput.

Kalaallit Nunaanni kommunit maannakkut killeqarfilersugaanerat Asiaq-p nunap assiliorsimavai nunap suatungaaniinnermi killeqarfiit Inatsisartut inatsisaanni nr. 11, 30. oktober 1998-imeersumi kingusinnerusukkullu allannguutai Inatsisartut inatsisaatigut nr. 2, 15. april 2003-meersumi oqaasertaanut naapertuuttunngorlugit, taakkununga ilanngunneqassapput nunanut allanut ministerip aamma USA'p 2003-mi ambassadurata akornanni allakkiat.

Kort- og Matrikelstyrelsen kiisalu Miljøministeria nunap assiutiminni siusinnerusukkut killeqarfiit piusut pigaat, tamatumali kingorna agguataarinermi allannguisoqarsimavoq, taamaattumik inatsisartut inatsisaannut atuuttunut tunngatillugu iluarsiinissat erseqqissaanissallu pisariaqarsimapput.

Nunap assiliorneq ingerlanneqarpoq Geografisk Informations Systemip digitalikkut pigisai aamma Kort- og Matrikelstyrelsep digitalikkut pigisai atorlugit.

4. Aningaasaqarnikkut allaffissornikkullu pisortanut kinguniusussat:

Innersuussutigineqarput aqqissuusseqqinneq pillugu inatsisissatut siunnersuummi immikkortup 4-ta ataani nassuiaatit nalinginnaasut.

5. Aningaasaqarnikkut allaffissornikkullu inuussutissarsiutinik ingerlataqartunut il.il. kinguniusussat:

Siunnersuut aningaasaqarnikkut allaffissornikkullu inuussutissarsiutinik ingerlataqartunut il.il. kinguneqassanngilaq.

6. Avatangiisinut pinngortitamullu kinguniusussat:

Siunnersuut avatangiisinut pinngortitamullu kinguneqassanganneqanngilaq.

7. Allaffissornikkut innuttaasunut kinguniusussat:

Nuna allanngutsaaliugaq aamma Pituffik kommuneqarfinnut agguataarineq pillugu inatsimmi pineqartunut ilaanngillat. Pituffik pineqartunut ilaanngilaq isumannaallisaanermi mianerisassat pillugit Nunalu allanngutsaaliugaq nunap susassa qarfigisaatut isigineqarpoq taakkulu pissutigalugit pineqartunut ilaanani. Attaveqarnermut Avatangiisinullu Naalakkersuisoqarfiup susassa qarfigaa Nuna allanngutsaaliugaq innuttaasullu qinnuteqaatit, apeqquteqaatit, ilisimatusarnissamut akuersissutit il.il. pillugit tassunga saaffiginnissapput.

8. Kinguniusinnaasut allat pingaaruteqarnerit:

Siunnersuut allanik pingaaruteqarnermik kinguneqassanngilaq.

9. Naalagaaffeqatigiinnermut namminersornermullu tunngasut:

Inatsisissatut siunnersuut toqqaannanngikkaluamik Naalagaaffeqatigiinnermut tunngasunik kinguneqassaaq, tassa Kalaallit Nunaata kommunerujussuarnut sisamanut aggorneqarnera pillugu inatsimmik allannguneq Kalaallit Nunaata namminersornissaanut suliniutit arlallit ilagimmassuk, tak. Namminersorneq pillugu Isumalioqatigiissitap isumaliutissiissummini 2003-meersumi kaammattuutai aamma Aaqqissuussaaneq pillugu Isumalioqatigiissitap isumaliutissiissutaa 2006-imeersoq.

10. Oqartussaasunik kattuffinnillu il.il tusarniaaneq:

Inatsisissatut siunnersuut akissuteqarnissamut sap. akunnerinik 6-inik piffissaliilluni tusarniaatigineqarsimavoq ukununga KANUKOKA, kommunit, DIM, DFFL, Aatsitassanut Ikummatissanullu Pisorta qarfik, Asiaq aamma biskoppe qarfik akissuteqaatit tiguneqariissallutik sisamangornermi 1. juli 2008.

Qeqqata kommuniani ikaarsaariarnermi ataatsimiititaliap kissaatigaa § 2, imm. 3 malillugu inatsisissami siunnersuut akuersaarneqassasoq taamaasilluni maannamut Sisimiut Maniitsullu kommuniisa nunanut aggorneqarneri siunnissami Qeqqata kommunerissammagu.

Tusarniaanermi akissummi Avannaata kommuniani ikaarsaariarnermi ataatsimiititaliamiit siunnersuutigineqarpoq § 2, imm. 4 innersuussutigalugu Nassuttuup nunataa tamaat Avannaata kommunianut ilanngunneqassasoq.

Kangiata/Kitaataa tusarniaanermut akissutaani ikaarsaariarnermi ataatsimiititaliap innersuussutigaa kujammut killiliussaq siulleq attasiinnarniarlugu kiisalu kissaatigineqartoq avannamut killiliussaq allanngortinneqassassoq Atammik ilanngullugu killigitinneqassasoq.

Ittoqqortoormiit kommunalbestyrelsiata siunnersuutigaa Kangia/Kitaata kommuniaata avannamut killinga Nunap eqqissisitat tungaanut nuunneqassasoq taamaasilluni Traill aamma Geographicap qeqertai kangeqqullugit avannamut Kejser Frantz

Joserfip kangerluanukartillugu tassanngaaniillu kimmorluinnaq Avannaata kommuniata killeqarfianut. (Takuuk nunap assinga ilanngunneqarsimasoq). Taamaattoq nuna eqqissisimataq ilanngunneqarsimanngilaq takuuk qulaani ilanngunneqarsimanngitsoq immikkoortup ataani 3.2-imi.

Kujataata kommuniata akuersaarsinnaavaa kangimut ilassutigineqartoq Timmiarmiut qeqertaasa avannaatungaanut kisiannili kitaani killigitinneqartoq Sermiligaarsummiit Arsuup kujataata kommunianut ilanngunneqarnissaa kissaatigalugu. Kommunerujussuannngortussat kommuninut sorlernut kattukkusunnerannut tusarniarneqarneranni 31.12.2006 tikitsinnagu akineqartussami Paamiut kommunalbestyrelsiisa aammalu Arsummi nunaqarfimmi aqutsisut kissaatigisimanngilaat kujataata kommunianut ilaatinneqarnissartik. Tamanna tusaatissatut tiguneqarsimavoq taamaattumillu inatsisissamut ilanngunneqarsimanani.

Inatsisissatut siunnersuummi aalajangersakkanut ataasiakkaanut nassuiaatit.

§ 1-imt.

Kalaallit Nunaata nunap immikkoortuinut agorneqarnera pillugu inatsisartut inatsiserisimasaat massakkut siunnersuummut ingerlateqqinneqarpoq, taaguutit Kalaallit Nunaata Avannaa, Kalaallit Nunaata Kitaa aamma Kalaallit Nunaata Kangia malittarisani assigiinngitsuni suli atorneqarnerat pissutaalluni. Taamaammat malittarisamut tassunga tunngatillugu nunap immikkoortuinut killilersuinissaq suli pisariaqarpoq.

§ 2-imut.

Kommunit kommunerujussuarnut sisamanut agorneqarnerat pillugu inatsit Kalaallit Nunaata namminersornissaanut naalakkersuinikkut sulinerup ilagaa (Namminersorneq pillugu Isumalioqatigiissitap isumaliutissiissutaa 2003-meersoq aamma Aaqquussaanermut Isumalioqatigiissitaq 2006). Kommuneni ikaarsaariarnermut ataatsimiititaliat sisamaasut tusarniaassutitut akissuteqarnerminni kommunit killeqarfissaat pillugit isumatik tusartippaat, naleqqiuguk immikkoortoq 10-mi tusarniaanermut tunngasoq.

§ 3-mut

Kommunit killeqarfiisa killilerneqarnerat Asiaq suleqatigalugu pivoq. Killeqarfiit pillugit nunap assingi Kort- og Matrikelstyrelsep Kalaallit Nunaat pillugu digitalikkut assiutai tunuliaqutaralugit Inatsisartut inatsisaat aallaavigalugit suliarineqarput. Siusinnerusukkut nunap assiliortarnermut tunngatillugu inatsit tunngavigalugu killeqarfiit nunami sumiippiarneri eqqornerusumik

takutinneqarsinnaalerput kiisalu Kangerlussuarmi mittarfiup eqqaani allannguutit aamma Pituffimmut tunngasut eqqornerullutik. Nunap assiliorneri ilanngussatut ilaapput.

§ 4-mut

Immap tungaanut killeqarfiit killeqarfinnut tunngaviusunut killilerneqarput. Killeqarfiit tunngaviusut United Nations Bulletin no. 56, Law of the Sea naapertorlugu atuupput.

§ 5-mut

4.a. Kalaallit Nunaata illersorneqarnera pillugu isumaqatigiissut 27. april 1951-imeersoq naapertorlugu (Thule Air base) Pituffik kommuninut agguataarinerup avataaniippoq.

4.b. Kiisalu kommuninut agguataarinerup avataaniippoq Kalaallit Nunaata avannaarsuani kangianilu Nuna allanngutsaaliugaq, taassuma killeqarfii takuneqarsinnaapput Kalaallit Nunaanni pinngortitamik allanngutsaaliuineq pillugu Inatsisartut inatsisaanni nr. 15, 9. november 1988-imeersumi, tassunga ilanngullugu Nuna allanngutsaaliugaq pillugu nalunaarut nr. 7, 17. juni 1992-imeersoq. Nuna allanngutsaaliugaq nunap susasaqarfīgisaatut isigineqarpoq, taamaattumik kommuninit aqutsivigineqarsinnaangilaq kommunerujussuillu sisamat pilersinneqarnerisigut inatsisikkut ugguuna killeqarfilersuinerup avataaniilluni. Nunap allanngutsaaliukkap siunissami aqutsivigineqarnissaa kingullermik oqallisaavoq Nuup Kommunanit Sermitsiami allaaserisakkut 15. september 2006-imi, taanna Naalakkersuisunit akineqarpoq.

§ 6-imut

Killeqarfiliinerit, matumanittaaq Kalaallit Nunaannit atortussiassat aatsitassanit pisut pillugit inatsimmut (atortussiassalerinermik inatsit) atatillugu killeqarfiliinerit, pillugit tunaartassanik erseqqinnerusunik Naalakkersuisut aalajangersaasinnaapput.

§ 7-imut

Kommunit ataasiakkaat taaguutaasa ilisarnaataasalu allanngortinneri inatsisartut inatsianni nr. 14, 19. november 2007-imeersumi § 16, imm. 2 naapertorlugu ikaarsaariarnermi ataatsimiititaliamit kingusinnerpaamik 1. august 2008-mi aalajangiiffigineqassapput. Tamanna kommuninut ataasiakkaanut Naalakkersuisuniit tusarniaanermi takuneqarsinnaavoq. Taamaasilluni ikaarsaariarnermi ataatsimiititaliat kommunit nutaat atissaat ilisarnaatissaallu innersuussutigaat taakkulu tunngavigalugit Naalakkersuisut Inatsisartullu akuersaarsimapput.

Inatsimmut piareersaatini takuneqarsinnaavoq taaguut ilisarnaallu inatsisartut inatsisaatigut aalajangersarneqassasut, ikaarsaariarnermili aaqqissuussinermut atatillugu inatsisissatut siunnersuutip aamma inatsimmut nassuiaatit akornanni assortuussuteqanngitsoq Naalakkersuisut isumaqarput.

§ 8-imut

Tungavissaatitaavoq inatsisip allanngortinnera 1. januar 2009-mi atuutilissasoq.